

VENDIM
Nr. 40/2017

PËR PROCEDURAT PARLAMENTARE PËR FUNKSIONIMIN E KOMISIONEVE *AD HOC* DHE REALIZIMIN E PROCESIT TË VOTIMIT, SIPAS LIGJIT NR. 84/2016, “PËR RIVLERËSIMIN KALIMTAR TË GJYQTARËVE DHE PROKURORËVE NË REPUBLIKËN E SHQIPËRISË”

Në mbështetje të nenit 78, të Kushtetutës, të nenit 8, pika 1, të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, si dhe të Rregullores së Kuvendit, me propozimin e një grupi deputetësh,

KUVENDI
I REPUBLIKËS SË SHQIPËRISË

VENDOSI:

KREU I
DISPOZITA TË PËRGJITHSHME

Neni 1
Qëllimi

Qëllimi i këtij vendimi është përcaktimi i rregullave të detajuara për funksionimin e komisioneve parlamentare *ad hoc* dhe realizimin e procesit të votimit, sipas ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

Neni 2
Objekti

Ky vendim përcakton:

1. Rregullat procedurale të organizimit dhe funksionimit të komisioneve *ad hoc* që krijohen sipas ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.
2. Rregullat procedurale të organizimit dhe zhvillimit të procesit të votimit në komisionet *ad hoc* që krijohen sipas ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.
3. Rregullat procedurale të organizimit dhe zhvillimit të procesit të votimit në seancë plenare të kandidatëve për krijimin e institucioneve të rivlerësimit, sipas ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

Neni 3
Parimet e funksionimit të komisioneve parlamentare *ad hoc*

Komisionet parlamentare *ad hoc* gjatë veprimtarisë së tyre respektojnë parimin e transparencës, informimit, mbrojtjes së sekretit shtetëror, mbrojtjes së konfidentalitetit, mbrojtjes së të dhënave dhe shmangies së konfliktit të interesit, sipas legjislacionit në fuqi.

KREU II
KOMISIONI PARLAMENTAR *AD HOC* PËR VERIFIKIMIN E KANDIDATËVE

Neni 4
Krijimi i komisionit

1. Avokati i Popullit i përcjell Kuvendit listën e kandidatëve, të cilët i plotësojnë kriteret formale, listën e kandidatëve, të cilët nuk i plotësojnë kriteret formale, dhe listën e rekomandimeve të Operacionit Ndërkombëtar të Monitorimit, së bashku me një kopje të dosjes individuale për çdo kandidat.

2. Kryetari i Kuvendit, brenda ditës së dorëzimit të listave të parashikuara në pikën 1, të këtij neni, njofton datën dhe orën e mbledhjes së seancës plenare për krijimin dhe përbërjen e komisionit *ad hoc* të verifikimit të kandidatëve, e cila zhvillohet brenda 3 ditëve nga marrja e këtyre listave.

3. Në njoftimin e përcaktuar në pikën 2, të këtij neni, Kryetari i Kuvendit u kërkon grupeve parlamentare të shumicës dhe pakicës parlamentare që të dërgojnë deri ditën e nesërme të njoftimit propozimet e tyre për përbërjen e këtij komisioni *ad hoc*. Grupet parlamentare të shumicës propozojnë 3 anëtarë dhe nga 1 anëtar zëvendësues dhe grupet parlamentare të pakicës propozojnë 3 anëtarë dhe nga 1 anëtar zëvendësues për përbërjen e komisionit *ad hoc*. Grupet parlamentare në propozimet e tyre respektojnë parimin e shmangies së konfliktit të interesit.

4. Kuvendi, me vendim, miraton në seancë plenare krijimin dhe përbërjen e komisionit *ad hoc* me 6 anëtarë për verifikimin e kandidatëve, sipas propozimeve të grupeve parlamentare. Vendimi i Kuvendit parashikon edhe kryetarin e komisionit nga radhët e shumicës parlamentare dhe zëvendës-kryetarin nga radhët e pakicës parlamentare.

Neni 5

Sekretariati teknik pranë komisionit

1. Sekretari i Përgjithshëm i Kuvendit, me urdhër, krijon një sekretariat teknik të përbërë nga një sekretar dhe këshilltarë, të cilët asistojnë veprimtarinë e komisionit *ad hoc* të verifikimit të kandidatëve.

2. Sekretari i Përgjithshëm i Kuvendit merr masat e tjera të nevojshme për krijimin e kushteve për ushtrimin e veprimtarisë së komisionit *ad hoc* të verifikimit të kandidatëve.

Neni 6

Organizimi i punimeve të komisionit

1. Kryetari i Kuvendit, brenda ditës së nesërme nga krijimi i komisionit *ad hoc*, i përcjell secilit prej anëtarëve të tij dokumentacionin për të gjithë kandidatët, ashtu siç është dërguar nga Avokati i Popullit. Kryetari i Kuvendit cakton datën dhe orën e mbledhjes së parë të komisionit, e cila zhvillohet brenda dy ditëve nga dita e krijimit të tij.

2. Në mbledhjen e parë, kryetari i komisionit i propozon komisionit programin e punës dhe kalendarin e zhvillimit të seancës dëgjimore publike me kandidatët dhe datën e përcjelljes së listës komisioneve.

3. Sekretariati teknik njofton kandidatët për zhvillimin e seancës dëgjimore. Njoftimi duhet të përmbajë datën, orën dhe vendin e zhvillimit të seancës.

Neni 7

Zhvillimi i seancave dëgjimore

1. Çdo anëtar i komisionit ka të drejtë t'u bëjë pyetje kandidatëve.

2. Anëtari i komisionit e merr fjalën për të bërë pyetje, pas dhënies së kësaj të drejte nga drejtuesi i seancës.

3. Anëtari i komisionit që pyet nuk ka të drejtë të japë konkluzione gjatë zhvillimit të seancës dëgjimore.

4. Anëtarët e komisionit nuk kanë të drejtë të komentojnë njëri-tjetrin për karakterin e pyetjeve që u drejtohen kandidatëve.

5. Drejtuesi i seancës i jep të drejtën e fjalës me radhë, një anëtar nga shumica parlamentare dhe një nga pakica.

6. Anëtari ka të drejtën për të kërkuar sqarime dhe saktësime të mëtejshme, vetëm pasi të ketë përfunduar radha për secilin nga anëtarët e tjerë.

Neni 8

Procesi i votimit

1. Komisioni *ad hoc*, pas zhvillimit të seancës/seancave dëgjimore me kandidatët, me propozim të një anëtari të tij, mund të kalojë një kandidat nga lista e kandidatëve që nuk plotësojnë kriteret formale te lista e kandidatëve që plotësojnë kriteret formale, me të paktën katër vota.

2. Pas përfundimit të votimit të emrave të kandidatëve të listës, sipas pikës 1, të këtij neni, komisioni *ad hoc*, me propozim të një anëtari të tij, mund të kalojë një kandidat nga lista e kandidatëve të rekomanduar nga Operacioni Ndërkombëtar i Monitorimit te lista e kandidatëve për votim, me të paktën pesë vota.

3. Listës së kandidatëve për votim që do t'u përcillet komisioneve *ad hoc* përzgjedhëse i bashkëngjitet, në rast se ka, edhe lista e votimit, sipas pikave 1 dhe 2 të këtij neni.

4. Kandidatët, të cilët janë në listën e kandidatëve që plotësojnë kriteret formale, përfshirë, në rast se ka, edhe ata që janë votuar sipas pikës 1, të këtij neni, por që nuk janë në listën e rekomandimeve të Operacionit Ndërkombëtar të Monitorimit, kalojnë automatikisht në listën për votim.

5. Lista për votim përmban kandidatët që plotësojnë kriteret formale, sipas pikës 4, të këtij neni, së bashku me kandidatët e votuar nga komisioni, sipas rregullave të përcaktuara në pikën 2 të këtij neni. Në rast se nuk ka votim sipas pikave 1 dhe 2 të këtij neni, atëherë do të mbetet si listë e vetme që kalon pa votim nga komisioni për verifikimin e kandidatëve, lista e kandidatëve që plotësojnë kriteret formale, përveç atyre që nuk janë të rekomanduar nga Operacioni Ndër-kombëtar i Monitorimit. Kjo është e vetmja listë e kandidatëve që i përcillet komisioneve *ad hoc* për votim.

6. Brenda dhjetë ditëve nga krijimi i tij, komisioni *ad hoc* i përcjell listën e hartuar sipas pikës 5, të këtij neni, komisioneve *ad hoc* përzgjedhëse, së bashku me dosjet personale të kandidatëve. Dy listat e tjera nuk dërgohen për votim.

KREU III

KOMISIONET PARLAMENTARE *AD HOC* TË PËRZGJEDHJES SË KANDIDATËVE

Neni 9

Krijimi i komisioneve parlamentare *ad hoc* të përzgjedhjes së kandidatëve

1. Kryetari i Kuvendit, brenda 3 ditëve nga dita e dorëzimit të listave të parashikuara në pikën 1, nenit 4, të këtij vendimi, njofton datën dhe orën e mbledhjes së seancës plenare për krijimin dhe përbërjen e dy komisioneve *ad hoc* të përzgjedhjes së kandidatëve. Kuvendi, me vendim, brenda 10 ditëve miraton në seancë plenare krijimin dhe përbërjen e komisioneve *ad hoc* të përzgjedhjes së kandidatëve, sipas propozimeve të grupeve parlamentare. Vendimi i Kuvendit parashikon dhe kryetarët e dy komisioneve nga radhët e shumicës parlamentare dhe zëvendëskryetarët e dy komisioneve nga radhët e pakicës parlamentare.

2. Në njoftimin e përcaktuar në pikën 1, të këtij neni, Kryetari i Kuvendit u kërkon grupeve parlamentare të shumicës dhe pakicës parlamentare që të dërgojnë brenda dy ditëve nga data e njoftimit propozimet e tyre për përbërjen e dy komisioneve *ad hoc*. Grupet parlamentare në propozimet e tyre respektojnë parimin e shmangies së konfliktit të interesit.

3. Dy komisionet *ad hoc* të përzgjedhjes përbëhen respektivisht nga:

a) 12 anëtarë, gjashtë të propozuar nga grupet parlamentare të shumicës dhe gjashtë nga grupet parlamentare të pakicës. Kuvendi miraton dhe një anëtar zëvendësues nga secili prej grupeve parlamentare;

b) 6 anëtarë, tre të propozuar nga grupet parlamentare të shumicës dhe tre nga grupet parlamentare të pakicës. Kuvendi miraton dhe një anëtar zëvendësues nga secili prej grupeve parlamentare.

4. Një deputet mund të jetë anëtar vetëm në njërin nga komisionet *ad hoc* të përzgjedhjes. Anëtarët e komisionit *ad hoc* të verifikimit të kandidatëve nuk kanë pengesë për të qenë edhe anëtarë në një nga komisionet *ad hoc* të përzgjedhjes.

Neni 10

Organizimi i punimeve të komisioneve

1. Kryetari i Kuvendit cakton datën dhe orën e mbledhjes së parë të secilit prej komisioneve *ad hoc* të përzgjedhjes, e cila zhvillohet brenda tre ditëve nga dita e krijimit të tyre.

2. Në mbledhjen e parë, secili prej komisioneve miraton kalendarin e zhvillimit të seancës dëgjimore publike me kandidatët e listës për votim, të përcjellë nga komisioni *ad hoc* i verifikimit, sipas nenit 8, pika 6, të këtij vendimi.

3. Sekretariati teknik përgatit njoftimet për kandidatët që ia përcjell Sekretarit të Përgjithshëm të Kuvendit. Ky i fundit bën njoftimin e kandidatëve për zhvillimin e seancës dëgjimore. Njoftimi duhet të përmbajë datën, orën dhe vendin e zhvillimit të seancës.

4. Brenda 30 ditëve nga konstituimi i tyre, secili komision *ad hoc* i përzgjedhjes zhvillon procedurën për votimin e kandidatëve.

Neni 11

Zhvillimi i seancave dëgjimore

1. Çdo anëtar i komisionit *ad hoc* të përzgjedhjes ka të drejtë t'u bëjë pyetje kandidatëve.

2. Anëtari i komisionit *ad hoc* të përzgjedhjes e merr fjalën për të bërë pyetje, pas dhënies së kësaj të drejte nga drejtuesi i seancës.

3. Anëtari i komisionit *ad hoc* të përzgjedhjes që pyet nuk ka të drejtë të japë konkluzione gjatë zhvillimit të seancës dëgjimore.

4. Anëtarët e komisionit *ad hoc* të përzgjedhjes nuk kanë të drejtë të komentojnë njëri-tjetrin për karakterin e pyetjeve që u drejtohen kandidatëve.

5. Drejtuesi i seancës i jep të drejtën e fjalës me radhë një anëtari nga shumica parlamentare dhe një nga pakica.

6. Anëtari i komisionit *ad hoc* të përzgjedhjes ka të drejtën për të kërkuar sqarime dhe saktësime të mëtejshme, vetëm pasi të ketë përfunduar radha për secilin nga anëtarët e tjerë.

KREU IV

PROCESI I VOTIMIT NË KOMISIONET *AD HOC* TË PËRZGJEDHJES SË KANDIDATËVE

Neni 12

Parimet e procesit të votimit në dy komisionet *ad hoc*

1. Procedura e votimit në secilin komision *ad hoc* bëhet pa debat, nëpërmjet një sistemi elektronik që mundëson votimin e fshehtë, ku secili anëtar voton për një kandidat.

2. Sistemi elektronik i votimit garanton në mënyrë të njëkohshme parimet e mëposhtme:
 - a) fshehtësinë e votës dhe pamundësinë e identifikimit apo individualizimit të saj në të ardhmen;
 - b) mundësinë që një anëtar të ketë të drejtën e vetëm një vote, për çdo proces votimi;
 - c) pamundësinë e përzgjedhjes së një kandidati nga më shumë se një anëtar i komisionit. Nëse një kandidat është përzgjedhur më shpejt në kohë nga njëri prej anëtarëve të komisionit, atëherë sistemi elektronik duhet të pamundësojë zgjedhjen e tij nga një anëtar tjetër në atë proces votimi;
 - ç) hapjen e sistemit të votimit në mënyrë të njëkohshme për secilin anëtar dhe mbylljen e tij vetëm pasi të kenë votuar të gjithë anëtarët;
 - d) identifikimin e anëtarit të komisionit, i cili nuk ka votuar dhe në këtë rast mosgjenerimin e rezulttit;
 - dh) përsëritjen e votimit në disa raste;
 - e) gjenerimin automatik të raportit (rezultatit) të votimit dhe pamundësinë e ndryshimit të tij, duke garantuar fshehtësinë e votës.

Neni 13

Procesi i votimit në komisionin *ad hoc* përzgjedhës për Kolegjin e Apelistit

1. Komisioni *ad hoc* i përzgjedhjes me 6 anëtarë përzgjedh nga lista e kandidatëve për votim shtatë kandidatët për gjyqtarë të Kolegjit të Apelistit, si dhe dy kandidatë zëvendësues për pozicionin e gjyqtarit të Kolegjit të Apelistit.
2. Specialistët e teknologjisë së informacionit në sekretariatit teknik mundësojnë hedhjen e listës së kandidatëve për votim sipas nenit 8, pika 6, të këtij vendimi, në sistemin elektronik të votimit.
3. Drejtuesi i mbledhjes, fillimisht, hap votimin për përzgjedhjen e gjashtë kandidatëve për gjyqtarë të Kolegjit të Apelistit. Pjesëmarrja e anëtarëve të komisionit në votim është e detyrueshme.
4. Secili prej anëtarëve të komisionit *ad hoc* përzgjedh nga lista elektronike e kandidatëve për votim vetëm një kandidat për gjyqtar të Kolegjit të Apelistit. Nëse një kandidat është përzgjedhur më shpejt në kohë nga njëri prej anëtarëve të tjerë të komisionit, atëherë anëtar i komisionit vijon me përzgjedhjen e një kandidati tjetër të listës elektronike. Në rast se të gjithë anëtarët e komisionit votojnë, atëherë sistemi elektronik gjeneron automatikisht raportin (rezultatit) përfundimtar të votimit.
5. Nëse ndonjë nga anëtarët nuk voton, atëherë sistemi elektronik identifikon anëtarin e komisionit që nuk ka votuar ende. Nëse anëtar i, edhe pas identifikimit dhe paralajmërimit të kryetarit të komisionit, refuzon të votojë për njërin nga kandidatët, atëherë procedura e votimit ndërpritet dhe votimi nuk është i vlefshëm dhe sistemi i votimit nuk gjeneron raport (rezultat) votimi. Nëse edhe gjatë votimit të dytë, një nga anëtarët e komisionit nuk voton, votimi përsëri nuk është i vlefshëm dhe sistemi përsëri nuk gjeneron raport (rezultat) votimi. Kryetari i Kuvendit njofton për zëvendësimin e anëtarit të komisionit, i cili nuk ka votuar me anëtarin respektiv zëvendësues, sipas parashikimeve të nenit 9, pika 3, të këtij vendimi. Nëse edhe ky anëtar zëvendësues nuk voton, Kryetari i Kuvendit fillon procedurën e zëvendësimit të tij, sipas nenit 10, pika 4, të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.
6. Pas përfundimit të përzgjedhjes së 6 kandidatëve për gjyqtarë të Kolegjit të Apelistit, sistemi elektronik i votimit gjeneron listën e mbetur të kandidatëve për votim. Kryetari i komisionit hap procesin e votimit për përzgjedhjen e kandidatit të shtatë për gjyqtar nga kandidatët e mbetur të listës përmes një votimi të thjeshtë, të fshehtë elektronik, ku kandidati me më shumë vota quhet i përzgjedhur.
7. Në rast barazie të votave fituesi përzgjidhet me short manual ndërmjet dy kandidatëve që kanë marrë numrin më të madh të votave. Në rast se ka më shumë se dy kandidatë me numër të njëjtë votash, fituesi përzgjidhet me short manual ndërmjet këtyre kandidatëve.
8. Shorti manual zhvillohet sipas kësaj procedure:
 - a) një enë transparente vendoset në një tavolinë, e cila shikohet qartë nga të gjithë anëtarët e komisionit *ad hoc*;

b) emri i çdo kandidati, i cili merr pjesë në short, shënohet në shirita letre dhe mbyllet në gogla të njëjta nga ngjyra dhe forma e jashtme dhe hidhen në enën transparente;

c) kryetari i komisionit tërheq njërën nga goglat e hedhura në enën transparente, e hap e lexon me zë të lartë dhe ua tregon të gjithë anëtarëve të komisionit dhe shpall rezultatin e shortit.

9. Procedura e parashikuar në pikat 6, 7 dhe 8, të këtij neni, zbatohet njëllëj edhe për zgjedhjen e dy kandidatëve zëvendësues për pozicionin e gjyqtarit të Kolegjit të Apelit nga lista e kandidatëve të mbetur për votim. Procesi i votimit zhvillohet me radhë për secilin nga pozicionet e zëvendësuesit.

10. Procedurat e hedhjes së çdo shorti pasqyrohen në procesverbal që nënshkruhet nga të gjithë anëtarët e komisionit *ad hoc*.

11. Pas përfundimit të procesit të votimit, komisioni menjëherë harton një raport, i cili përmban listën e kandidatëve të përzgjedhur sipas këtij neni dhe ia përcjell Sekretarit të Përgjithshëm të Kuvendit.

Neni 14

Procesi i votimit në komisionin *ad hoc* përzgjedhës për komisionerët

1. Komisioni *ad hoc* i përzgjedhjes me 12 anëtarë fillon procesin e votimit pasi ka përfunduar procesin e votimit në komisionin *ad hoc* të përzgjedhjes me 6 anëtarë.

2. Nëse një kandidat ka aplikuar për më shumë se një funksion dhe është përzgjedhur në njërin prej funksioneve të votuar më parë në komisionin *ad hoc* të përzgjedhjes me 6 anëtarë, emri i tij hiqet nga lista e kandidatëve për votim.

3. Specialistët e teknologjisë së informacionit në sekretariatit teknik mundësojnë hedhjen e listës së kandidatëve për votim sipas pikës 2, të këtij neni, në sistemin elektronik të votimit.

4. Komisioni *ad hoc* i përzgjedhjes me 12 anëtarë përzgjedh nga lista e kandidatëve për votim 12 kandidatët për komisioner dhe dy kandidatë zëvendësues për komisioner në Komisionin e Pavarur të Kualifikimit, si dhe dy komisionerët publikë e dy zëvendësuesit e tyre.

5. Kryetari i komisionit *ad hoc*, fillimisht, hap votimin për përzgjedhjen e 12 kandidatëve për komisioner në Komisionin e Pavarur të Kualifikimit. Pjesëmarrja e anëtarëve të komisionit në votim është e detyrueshme. Secili prej anëtarëve të komisionit *ad hoc* përzgjedh nga lista elektronike e kandidatëve për votim vetëm një kandidat për komisioner. Nëse një kandidat është përzgjedhur më shpejt në kohë nga njëri prej anëtarëve të tjerë të komisionit, atëherë anëtari i komisionit vijon me përzgjedhjen e një kandidati tjetër të listës elektronike. Pas votimit nga të gjithë anëtarët e komisionit sistemi elektronik gjeneron automatikisht raportin (rezultat) përfundimtar të votimit.

6. Nëse ndonjë nga anëtarët nuk voton, atëherë sistemi elektronik identifikon anëtarin e komisionit që nuk ka votuar ende. Nëse anëtari, edhe pas identifikimit dhe paralajmërimit të kryetarit të komisionit *ad hoc*, refuzon të votojë për njërin nga kandidatët, atëherë procedura e votimit ndërpritet dhe votimi nuk është i vlefshëm dhe sistemi i votimit nuk gjeneron raport (rezultat) votimi. Kryetari i komisionit përsërit edhe njëherë nga fillimi, procesin e votimit. Nëse edhe gjatë votimit të dytë një nga anëtarët e komisionit nuk voton, Kryetari i Kuvendit njofton zëvendësimin e anëtarit të komisionit, i cili nuk ka votuar, me anëtarin respektiv zëvendësues, sipas parashikimeve të nenit 9, pika 3, të këtij vendimi. Nëse edhe ky anëtar zëvendësues nuk voton, Kryetari i Kuvendit fillon procedurën e zëvendësimit të tij, sipas nenit 10, pika 4, të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

7. Pas përfundimit të përzgjedhjes së 12 kandidatëve për komisionerë, sistemi elektronik i votimit gjeneron listën e mbetur të kandidatëve për votim. Kryetari i komisionit *ad hoc* hap procesin e votimit për përzgjedhjen e dy kandidatëve zëvendësues për pozicionin e komisionerëve pranë komisionit, nga kandidatët e mbetur të listës përmes një votimi të thjeshtë, të fshehtë elektronik, ku kandidati me më shumë vota quhet i përzgjedhur. Procesi i votimit zhvillohet me radhë për secilin nga pozicionet e zëvendësuesit.

8. Në rast barazie të votave, fituesi përzgjidhet me short manual ndërmjet dy kandidatëve që kanë marrë numrin më të madh të votave. Në rast se ka më shumë se dy kandidatë me numër të njëjtë votash,

fituesi përzgjidhet me short manual ndërmjet këtyre kandidatëve.

9. Shorti manual zhvillohet sipas kësaj procedure:

a) një enë transparente vendoset në një tavolinë, e cila shikohet qartë nga të gjithë anëtarët e komisionit *ad hoc*;

b) emri i çdo kandidati, i cili merr pjesë në short, shënohet në shirita letre dhe mbyllet në gogla të njëjta nga ngjyra dhe forma e jashtme dhe hidhen në enën transparente;

c) kryetari i komisionit tërheq njërën nga goglat e hedhura në enën transparente, e hap, e lexon me zë të lartë dhe ua tregon të gjithë anëtarëve të komisionit dhe shpall rezultatin e shortit.

10. Procedurat e hedhjes së çdo shorti pasqyrohen në procesverbal që nënshkruhet nga të gjithë anëtarët e komisionit *ad hoc*.

11. Procedura e parashikuar në pikat 7, 8, 9 dhe 10, të këtij neni, zbatohet edhe për zgjedhjen e dy komisionerëve publikë, si dhe të dy kandidatëve zëvendësues për komisioner publik, nga lista e kandidatëve të mbetur të listës për votim.

12. Pas përfundimit të procesit të votimit, komisioni menjëherë harton një raport, i cili përmban listën e kandidatëve të përzgjedhur sipas këtij neni dhe ia përcjell Sekretarit të Përgjithshëm të Kuvendit.

Neni 15

Hartimi i listës

1. Sekretari i Përgjithshëm i Kuvendit, brenda dy ditëve nga përfundimi i procesit të votimit në komisionet *ad hoc* të përzgjedhjes, harton listën e kandidatëve të përzgjedhur për gjyqtarë të Kolegjit të Apelit, komisionerë të Komisionit të Pavarur të Kualifikimit dhe komisionerë publikë.

2. Sekretari i Përgjithshëm i Kuvendit i dërgon Kryetarit të Kuvendit listën e hartuar sipas pikës 1, të këtij neni, bashkë me rezultatet e votimit, të prodhuara nga sistemi elektronik.

Neni 16

Sekretariati teknik pranë komisionit

1. Sekretari i Përgjithshëm i Kuvendit, me urdhër, krijon nga një sekretariat teknik për secilin komision *ad hoc* të përzgjedhjes së kandidatëve, të përbërë nga një sekretar, këshilltarë juristë dhe specialistë të teknologjisë së informacionit, të cilët asistojnë veprimtarinë e komisionit *ad hoc* të përzgjedhjes së kandidatëve.

2. Secili grup parlamentar cakton ekspertë për të mbikëqyrur funksionimin e sistemit elektronik të votimit në komision.

3. Sekretari i Përgjithshëm i Kuvendit merr masat e tjera të nevojshme për krijimin e kushteve për ushtrimin e veprimtarisë së komisioneve *ad hoc* të përzgjedhjes së kandidatëve.

KREU V

VOTIMI NË SEANCË PLENARE

Neni 17

Votimi në seancë plenare

1. Kryetari i Kuvendit, menjëherë nga marrja e listës nga Sekretari i Përgjithshëm i Kuvendit, sipas pikës 2, të nenit 15, të këtij vendimi, cakton datën dhe orën e mbledhjes së seancës plenare, si dhe i përcjell të gjithë deputetëve këtë listë. Seanca plenare zhvillohet brenda 10 ditëve nga marrja e listës së kandidatëve në bllok prej Kryetarit të Kuvendit.

2. Kuvendi miraton listën e kandidatëve në bllok me tre të pestat e votave të të gjithë anëtarëve.

3. Në rast se Kuvendi nuk e miraton listën e kandidatëve në bllok, sipas pikës 2, të këtij neni, Kryetari i Kuvendit ia kthen atë komisioneve *ad hoc* për përsëritjen e procesit të përzgjedhjes, duke caktuar në të njëjtën kohë dhe datën e zhvillimit të mbledhjes së parë të komisionit. Komisionet *ad hoc* duhet ta

kryejnë procesin e përzgjedhjes brenda 10 ditëve.

4. Komisionet *ad hoc* të përzgjedhjes zbatojnë rregullat e parashikuara në nenet 13 dhe 14 të këtij vendimi.

5. Sekretari i Përgjithshëm i Kuvendit i dërgon Kryetarit të Kuvendit listën e dytë të kandidatëve në bllok, të hartuar sipas pikës 2, të nenit 15, të këtij vendimi bashkë me rezultatet e votimit, të prodhuara nga sistemi elektronik.

6. Kryetari i Kuvendit, menjëherë nga marrja e listës së kandidatëve në bllok nga Sekretari i Përgjithshëm i Kuvendit, sipas pikës 5, të këtij neni, cakton datën dhe orën e mbledhjes së seancës plenare, si dhe i përcjell të gjithë deputetëve këtë listë. Seanca plenare zhvillohet brenda 10 ditëve nga marrja e listës së dytë të kandidatëve në bllok prej Kryetarit të Kuvendit.

7. Kuvendi, mund ta rrëzojë në bllok listën e kandidatëve me dy të tretat e të gjithë anëtarëve të tij. Në rast se lista nuk rrëzohet, kandidatët e përzgjedhur konsiderohen të zgjedhur.

8. Vendimi i Kuvendit për miratimin e listës së kandidatëve të zgjedhur botohet në numrin më të parë të Fletores Zyrtare.

9. Në rast se lista e dytë e kandidatëve në bllok rrëzohet nga Kuvendi, vendimi i Kuvendit botohet në numrin më të parë të Fletores Zyrtare.

10. Në rast se lista e dytë e kandidatëve në bllok rrëzohet nga Kuvendi, sipas pikës 7, të këtij neni, ngarkohen organet e parashikuara në këtë ligj të fillojnë procedurën për plotësimin e vendeve vakante, duke respektuar procedurat e parashikuara në Kushtetutë dhe në ligj.

KREU VI DISPOZITAT E FUNDIT

Neni 18

Rregullat procedurale të përcaktuara në Rregulloren e Kuvendit për komisionet e përhershme parlamentare zbatohen për aq sa është e mundur edhe për komisionet e përcaktuara në këtë vendim.

Neni 19 **Hyrja në fuqi**

Ky vendim hyn në fuqi menjëherë.

KRYETARI
Ilir Meta

Miratuar në datën 11.4.2017